

Predgovor

Polazeći od važnosti finansiranja i subvencioniranja poljoprivrede, u ovom radu su izloženi mogući oblici finansiranja i podrške poljoprivredi. Navedene prijedloge treba posmatrati sa stanovišta neminovnosti korištenja poljoprivrednih resursa, dostignutog stepena razvijenosti poljoprivrede, priprema za ulazak u međunarodne integracije, te njenog značaja za ekonomiju naše države. Predloženi modeli finansiranja, subvencija i podsticaja treba da omoguće rast proizvodnje, konkurentnosti, kvaliteta proizvoda, izmjenu proizvodne strukture i uspješnije pozicioniranje robnih proizvođača na domaćem i stranom tržištu u tranzicijskom periodu. Po okončanju tog perioda postepeno bi trebalo prelaziti na podršku komercijalnim gazdinstvima kroz investicije i razvoj kao i podršku razvoju ruralnih područja kroz različite oblike programa integralnog ruralnog razvoja, zaštite okoline i prelazak na direktna plaćanja. U radu su predstavljeni konkretni načini ukupne podrške, počev od izgradnje institucionalne infrastrukture do zakonskog uređenja ovog sektora. Institucionalna infrastruktura podrazumijeva formiranje fonda za razvoj poljoprivrede, agrarnog budžeta, agrarne banke, agencije za unapređenje izvoza i sl. Finansiranje poljoprivrede je postalo danas jedno od najaktuelnijih pitanja. Od ispravno postavljenih modaliteta finansiranja zavisi doprinos poljoprivrede opštem privrednom razvoju. Ukoliko se želi poboljšati materijalni položaj poljoprivrede i omogućiti njeno izjednačenje sa ostalim sektorima, potrebno je povećati nivo izdvajanja za podršku razvoju poljoprivrede, kao i nivo tekućih subvencija. Predloženi modeli finansiranja predstavljaju osnovu za efikasnije korištenje finansijskih instrumenata u agraru, kao i za dalju teorijsku nadgradnju.